



Comhairle an
Aontais Eorpaigh

An Bhruiséil, 17 Márta 2020
(OR. en)

8928/19

Comhad Idirinstitiúideach:
2019/0090 (NLE)

PECHE 221

GNÍOMHARTHA REACHTACHA AGUS IONSTRAIMÍ EILE

Ábhar:	CINNEADH ÓN gCOMHAIRLE maidir le tabhairt i gcrích an Phrótacail maidir le cur chun feidhme an Chomhaontaithe Comhpháirtíochta Iascaigh idir an Comhphobal Eorpach agus Poblacht Ghuine Bissau (2019-2024)
--------	--

CINNEADH (AE) 2019/... ÓN gCOMHAIRLE

an ...

maidir le tabhairt i gcrích an Phrótacail maidir le cur chun feidhme an Chomhaontaithe Comhpháirtíochta Iascaigh idir an Comhphobal Eorpach agus Poblacht Ghuine Bissau (2019-2024)

TÁ COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh, agus go háirithe Airteagal 43 de, i gcomhar le pointe (a)(v) den dara fomhír d'Airteagal 218(6) agus Airteagal 218(7),

Ag féachaint don togra ón gCoimisiún Eorpach,

Ag féachaint don toiliú ó Pharlaimint na hEorpa¹⁺,

¹ Toiliú an ... (nár foilsíodh fós san Iris Oifigiúil).
⁺ IO: líon isteach le do thoil an fonóta thuas.

De bharr an mhéid seo a leanas:

- (1) An 17 Márta 2008, ghlac an Chomhairle Rialachán (CE) Uimh.241/2008¹, lenar tugadh i gcrích an Comhaontú Comhpháirtíochta Iascaigh idir an Comhphobal Eorpach agus Poblacht Ghuine Bissau² ("an Comhaontú"). Tháinig an Comhaontú i bhfeidhm an 15 Aibreán 2008, rinneadh é a athnuachan go hintuigthe agus tá sé fós i bhfeidhm.
- (2) Tar éis an mholta ón gCoimisiún, chinn an Chomhairle an 28 Feabhra 2017 tús na caibidlíochta le Poblacht Ghuine Bissau a údarú chun prótacal nua lena gcuirtear an Comhaontú chun feidhme a thabhairt i gcrích.
- (3) Chuaigh an prótacal roimhe sin a bhí ag gabháil leis an gComhaontú in éag an 23 Samhain 2017.
- (4) Rinne an Coimisiún, thar ceann an Aontais, prótacal nua a chaibidil. Mar thoradh ar an gcaibidlíocht sin, cuireadh inisealacha leis an bprótacal nua an 15 Samhain 2018.

¹ Rialachán (CE) Uimh. 241/2008 ón gComhairle an 17 Márta 2008 maidir leis an gComhaontú Comhpháirtíochta Iascaigh idir an Comhphobal Eorpach agus Poblacht Ghuine Bissau a thabhairt i gcrích (IO L 75, 18.3.2008, lch. 49).

² IO L 342, 27.12.2007, lch. 5.

- (5) I gcomhréir le Cinneadh (AE) 2019/... ón gComhairle¹⁺, síníodh an Prótacal maidir le cur chun feidhme an Chomhaontaithe Comhpháirtíochta Iascaigh idir an Comhphobal Eorpach agus Poblacht Ghuine Bissau (2019-2024) ("an Prótacal") an ...⁺⁺.
- (6) Tá an Prótacal á chur i bhfeidhm ar bhonn sealadach ó dháta a sínithe.
- (7) Is é is cuspóir an Phrótacail a chur ar chumas an Aontais agus Phoblacht Ghuine Bissau oibriú níos dlúithe chun beartas iascaigh inbhuanaithe a chur chun cinn, acmhainní iascaigh in uiscí Ghuine Bissau a shaothrú ar bhealach fóna, agus a chur ar chumas Ghuine-Bissau iarrachtaí a dhéanamh geilleagar gorm a fhorbairt.
- (8) Ba cheart an Prótacal a fhormheas.

¹ Cinneadh (AE) 2019/... ón gComhairle an ... maidir le síniú, thar ceann an Aontais Eorpaigh agus, cur i bhfeidhm sealadach an Phrótacail maidir le Comhaontú Comhpháirtíochta Iascaigh idir an Comhphobal Eorpach agus Poblacht Ghuine Bissau a thabhairt i gcrích (2019-2024) (IO L ...).

⁺ IO: cuir isteach sa téacs, le do thoil, uimhir an chinnidh atá in st 8917/19 agus críochnaigh an fonóta comhfhreagrach.

⁺⁺ IO: cuir isteach, le do thoil, dáta sínithe an Phrótacail in st 8894/19.

- (9) Le hAirteagal 10 den Chomhaontú, bunaítear an Comhchoiste a bheidh freagrach as faireachán a dhéanamh ar a chur chun feidhme. Thairis sin, i gcomhréir leis an Airteagal sin, agus le hAirteagal 5, le hAirteagal 6(4), le hAirteagal 7(4) agus le hAirteagal 8(2) agus (4) den Phrótacal, is féidir leis an gComhchoiste modhnuithe áirithe ar an bPrótacal a ghlacadh. D'fhonn formheas na modhnuithe sin a éascú, ba cheart a údarú don Choimisiún, faoi réir coinníollacha sonracha substainteacha agus nós imeachta, iad a fhorghnóthú thar ceann an Aontais faoi nós imeachta simplithe.
- (10) Ba cheart do Choiste Bhuanionadaithe Rialtais na mBallstát seasamh an Aontais a bhunú maidir leis na modhnuithe ar an bPrótacal. Glacfar leis na leasuithe atá beartaithe mura rud é go ndéanfaidh mionlach blocála de chuid na mBallstát agóid i gCoiste Bhuanionadaithe Rialtais na mBallstát i gcoinne na modhnuithe sin i gcomhréir le hAirteagal 16(4) den Chonradh ar an Aontas Eorpach.
- (11) Ba cheart an seasamh atá le glacadh ag an Aontas sa Chomhchoiste maidir le hábhair eile a chinneadh i gcomhréir leis na Conarthaí agus le foirmeacha seanbhunaithe cleachtais,

TAR ÉIS AN CINNEADH SEO A GHLACADH:

Airteagal 1

Déantar leis seo an Prótacal maidir le cur chun feidhme an Chomhaontaithe Comhpháirtíochta Iascaigh idir an Comhphobal Eorpach agus Poblacht Ghuine Bissau (2019-2024) a fhormheas thar ceann an Aontais.¹⁺

Airteagal 2

Tabharfaidh Uachtarán na Comhairle, thar ceann an Aontais, an fógra dá bhforáiltear in Airteagal 17 den Phrótacal.

¹ Foilsíodh téacs an Phrótacail in... in éineacht leis an gcinneadh tráth a shínithe.

⁺ IO: líon isteach le do thoil an fonóta thuas.

Airteagal 3

I gcomhréir leis an nós imeachta a leagtar síos san Iarscríbhinn a ghabhann leis an gCinneadh seo, údarófar don Choimisiún modhnuithe a fhormheas a dhéanfar ar an bPrótacal atá le glacadh ag an gComhchoiste arna bhunú faoi Airteagal 10 den Chomhaontú.

Airteagal 4

Tiocfaidh an Cinneadh seo i bhfeidhm ar lá a ghlactha.

Arna dhéanamh in/sa ...,

Thar ceann na Comhairle

An tUachtarán

IARSCRÍBHINN

An nós imeachta maidir le formheas a dhéanamh ar na modhnuithe ar an bPrótacal
atá le glacadh ag an gComhchoiste

I gcás ina n-iarrfar ar an gComhchoiste modhnuithe ar an bPrótacal a ghlacadh i gcomhréir le hAirteagal 5, le hAirteagal 6(4), le hAirteagal 7(4) agus le hAirteagal 8(2) agus (4) den Phrótacal, údarófar don Choimisiún na modhnuithe atá beartaithe a fhorghéarú thar ceann an Aontais, faoi na coinníollacha seo a leanas:

- (1) Maidir leis an bhformheas a dhéanfar thar ceann an Aontais, áiritheoidh an Coimisiún:
 - (a) go mbeidh sé i gcomhréir le cuspóirí an Chomhbheartais Iascaigh;
 - (b) go mbeidh sé comhsheasmhach leis na rialacha ábhartha arna nglacadh ag eagraíochtaí réigiúnacha bainistithe iascaigh agus go gcuirfear san áireamh ann comhbhainistiú arna dhéanamh ag Stáit chósta;
 - (c) go gcuirfear san áireamh ann an fhaisnéis staidrimh, an fhaisnéis bhitheolaíoch agus an fhaisnéis ábhartha eile is déanaí a chuirtear chuig an gCoimisiún.
- (2) Sula ndéanfaidh an Coimisiún modhnuithe atá beartaithe a fhorghéarú thar ceann an Aontais, cuirfidh an Coimisiún faoi bhráid na Comhairle iad in am trátha roimh an gcruinniú ábhartha den Chomhchoiste.
- (3) Déanfaidh Coiste Bhuanionadaithe Rialtais na mBallstát measúnú ar chomhréireacht na modhnuithe atá beartaithe leis na critéir a leagtar síos i bpointe 1 den Iarscríbhinn seo.

- (4) Mura ndéanfaidh líon áirithe Ballstát agóid i gcoinne na modhnuithe atá beartaithe, líon atá ar cóimhéid le mionlach blocála de chuid na Comhairle i gcomhréir le hAirteagal 16(4) den Chonradh ar an Aontas Eorpach, formheasfaidh an Coimisiún thar ceann an Aontais iad. Má tá an mionlach blocála sin ann, diúltóidh an Coimisiún, thar ceann an Aontais, do na modhnuithe atá beartaithe.
- (5) Más rud é, le linn cruinnithe a thionólfar le Guine Bissau ina dhiaidh sin, lena n-áirítear cruinnithe ar an láthair, nach féidir teacht ar chomhaontú, cuirfear an t-ábhar faoi bhráid na Comhairle arís eile, i gcomhréir leis an nós imeachta a leagtar amach i bpointí 2 go 4, chun go gcuirfear eilimintí nua san áireamh i seasamh an Aontais.
- (6) Iarrtar ar an gCoimisiún aon bheart is gá a dhéanamh, in am trátha, mar obair leantach ag éirí as cinneadh an Chomhchoiste, lena n-áirítear, i gcás inarb iomchuí, an cinneadh ábhartha a fhoilsiú in *Iris Oifigiúil an Aontais Eorpaigh* agus aon togra is gá chun cur chun feidhme an chinneadh sin a thíolacadh.
- (7) In ábhair eile nach mbaineann le modhnuithe ar an bPrótacal i gcomhréir le hAirteagal 5, le hAirteagal 6(4), le hAirteagal 7(4) agus le hAirteagal 8(2) agus (4) de, déanfar an seasamh atá le glacadh ag an Aontas sa Chomhchoiste a chinneadh i gcomhréir leis na Conarthaí agus le foirmeacha seanbhunaithe cleachtais oibre.
-